



### **Armonisaziun da las chaschas da pensiun**

Las chaschas da pensiun dal Cumün da Zernez vegnan armonisadas süls 1. schner 2019. La suprastanza cumünala ha tschernü la firma Marc AG sco agent. Ils trais rapreschantants dals impiegats da la cumischiun da prevenziun sun gnüts elets dal persunal dal Cumün da Zernez. Ils trais rapreschantants dal patrun da lavur da la cumischiun da prevenziun sun gnüts elets da la suprastanza cumünala. Ils ses rapreschantants da la cumischiun da prevenziun decidan lura che chascha da pensiun chi vain tschernüda per tuot ils impiegats da cumün.

### **Management da ris-chs pel Cumün da Zernez – modul II**

La suprastanza cumünala ha decis dal 2016 da s-chaffir pel Cumün da Zernez ün'analisa da ris-chs da privels da la natüra per tuot on (IRM - Integrales Risikomanagement). D'incuort ha gnü lö üna sezzüda cun l'uffizi chantunal da god e privels da la natüra per discuter sur da differents pass e decisiuns dal modul II. Quel prevezza chi ha da gnir restructurà il stab da crisa cumünal. Il modul III vain instradà plü tard.

### **Pumpiers Zernez - veiculs I (salvamaint sün vias) e II (gruppa da gas) - submitsiun**

La sgüranza d'edifizis dal Grischun (GVG) ha approvà la documainta da submitsiun per la furniziun da duos veiculs novs pel 2018. I's tratta d'ün veicul nov pel salvamaint sün vias ed ün nov per la gruppa da gas. La dumonda da credit es gnüda approvada a la radunanza cumünala dals 02-12-2016. La furniziun dals duos veiculs es previssa sülla stà 2018, eventualmaing eir per la stà 2019.

### **Forz'electricca - definiziun "contribuziun al man public" per l'on 2018**

Minch'on ston ils cumüns definir l'import chi vain indemnisa pels drets da passagi/transport d'energia, la "contribuziun al man public". Ils abitants da las fracziuns Brail, Zernez, Susch e Lavin pajan fin uossa 0.6 raps/ukw. La suprastanza ha decis da laschar l'import eir pel 2018 sco fin uossa. L'import da 1.5 raps/ukw pel proget Zernez Energia 2020 vain inchaschè eir in avegnir be illa fracziun da Zernez.

### **Sanaziun dal suotpassagi da la VR in Champatsch - approvaziun cumpra definitiva ed adöver temporari da terrain**

La suprastanza ha sancziunà la cumpra definitiva dal terrain e l'adöver temporari da terrain per la fabrica dal suotpassagi da la Viafier Retica in Champatsch a Zernez.

### **Quartier Muglinè - surdatta d'incumbenzas**

Per las lavurs da fabrica da l'infrastructura publica in Muglinè sun gnüdas surdattas las lavurs a seguaintas firmas: lavurs d'impressari a Foffa Conrad SA, Zernez; lavurs da sanitari a Tung SA, Zernez; lavurs d'electricker a l'Energia Engiadina, Scuol.

### **Planisaziun d'areal Cul - surdatta incumbenza masüraziuns dal terrain**

La suprastanza cumünala ha surdat la lavur per las masüraziuns dal terrain in Cul a la firma Geo Alpin SA a Zernez.

### **Prüma lectüra preventiv 2018**

Ils gremis responsabels han repassà il prüm sböz dal preventiv dal quint d'investiziuns e dal quint da success per l'on 2018. La segunda lectüra dal preventiv 2018 ha lö in october.